

John W. Lee:

Bin gosa...un fiesta pa bo wowonan



Ateliers '89 Fundacion, ta brinda nos hunto cu e directiva y personal di Emma School un fiesta visual briyante di color y hopi spontaneo, di curashi y talento.

Alumnonan y maestronan di e institucion den hubileo total ta laga nos mira y biba spontaneamente kico creatividad, impulso propio y motivacion por yega na crea. Un exposicion cu ta sorprende nos y ta laga nos disfruta di dje na un manera unico y special. Un experiencia cu ta laga bo bay cas masha contento y alegre mes.

Si bo ta canando banda di e plachinan colorido di e exposicion, casi bo no por imagina bo mes cu e hobennan

aki cu nan limitacion special, a crea asina tanto obra bunita y alabes interesante. Loke ta resalta ta cu e alumnonan por a keda nan mes. Nan no mester a traha obranan di arte, pero nan mester a expresa nan mes espontaneamente manera un mucha so por. Ta bisto cu e colaboracion di alumno y maestro a trece padilanti un proceso creativo na unda diferente formacion y postura, a yega excelente-mente na nan culminacion. Hopi importante durante e proceso creativo ta cu na banda di e desaroyo visual di e talentonan tambe e motoriek fini e "problem solving" tambe un cierto postura critico ta yega na ordo. Si algun momento bo a siña con pa resolve problemanan lo bo no keda papia pa eternidad riba e

tema aki. Papiu solamente no ta yuda. Busca un caminda y carga esaki si ta yuda. Manteniendo un postura critico lo bo reconoce bo fayonan haci y lo no bolbe haci esaki. Haciendo fout bo ta siña. Lo bo siña con bo por cambia pa un manera mas efectivo y positivo pa asina biba bo bida na un manera mas placentero. E desaroyo di e motoriek finit un manera consciente y miho di traha cu aparatonan y mashinnan. Pa haci esaki pa bo ofishi, hopi bes un bon postura di traha ta hopi importante na banda di tur locual bo a siña y sa.

Pasando asina den e magifico presentacion aki di e obranan di e alumnonan, bo ta realiza cu aki a wordo traha serio na e formacion di e ho-

bennan. Un formacion hopi importante pa nan existencia den e futuro cercano. Nos ta wordo confronta aki cu un forma di educacion formal y serio. Door di ehecuta diferente temanan e alumnonan ta engrandece nan conocimiento cu ta start asina e proceso di pensa y crea. Durando creacion y dunando forma e alumno mes ta desaroya y su motoriek igual.

E totalidad briyante ta contesta di e ambiente genial di e school special aki. E presentacion unico di e exposicion, combina cu e amor di e maestronan pa nan trabou y e mucha ta e motor gigantesco di e institucion aki. Un exposicion leuk, agradabel, pero tambe masha educativo na unda bo ta wordo motiva

pa haci bo best y presenta resultadonan grandi. Un luga sigur unda bo kier ta y unda bo ta wordo motiva.

Bo ta mira den e exposicion aki, kico esaki kier conta nos. Absolutamente lo bo disfruta de e exposicion bunita aki, cu a wordo instala y presenta na un manera unico y hopi profesional.

E "aventura aki" intenso ta algo cu bo mes mester wak pa asina bo realiza kico por wordo haci y logra cu experiencia y trabou duro, inspiracion y talento maximo.

Pabien muchanan y maestronan Emma school..... pabien ateliers '89....

Nota:

E exposicion aki 60 Aña Emma School ta habri te cu diabierna awor diariamente di 9am pa 12pm y di 2pm pa 6pm. Entrada ta gratis.

Ateliers '89 ta situa na Dominicanessenstr 34, Oranjestad.

Pa informacion adicional por yama na tel: 5885776 o 5654613. □